

Tlapannextiliztli

John Sullivan huan Justyna Olko

Hueliz tiquixmatiya Crispín Martínez Rosas. Yehyectzin quen huica, yehyectzin quen tlatzotzona, yehyectzin hui-caliztli tlen quiihcuilohtoc: “Nimitzillamiqui”, “Canin tinemi”, “Xinolah”, “Tateh Juan”. Huan naman quipannextia achtohui iamox, Tlallamiquiliztli inelhuayo. Nelpatíyoh ni xochitlapohualiztli. Quemman pehuaz ticpohuaz, axcanah hueliz ticcahuaz pampa amoxtli mitztilanaz huan mitzcala-quiz pan pilaltepetzin campá nemih miac macehualmeh tlen tiquinixmatiya: macehualmeh tlen tlatlepanittah huan cequinoqueh tlen tepazhuiah; tlaichtequinih tlen quintotocah macehualmeh huan quitlatiah ininchan huan ininmillah; telpocatl tlen quiiachtequi ichpocatl huan iuhquinon mocihuatia pampa prohueh huan axcanah quiceliah ichpocatl itatahuan; cihuameh tlen mochicahuiliah huan momanahuiah quemman pano tlamantli tlen axcualli; telpocatl tlen yohui Mexco huan axcanah quiihyohuia nemiliztli tlen huei altepetl; macehualmeh tlen cualli quimatih quixolehuazceh nochí tlamantli cualantli pan pilaltepetzin; macehualmeh tlen mohmoztlah tequitih huan mopalehuiah. Nouhquiya tiquittaz rohuente h tlen quinhuilana macehualmeh cuatitlan; axcanelimeh tlen anotzah; papameh tlen quinmanextiah macehualmeh canin yohuih; cuatitlan iteucco tlen quinmanahuia tecuanimeh; tonatiuh tlen moixchichilohtoc pampa quiitta nochí tlen pano huan pinahua. Tiquillamiquiz yoltoc nochí tlen oncah tlalticpac huan ilhuicac. Huan

timotlahtlaniliz tlan tlamantli tlen mictoc nocca hueli
chamaniz. Tlahcuilohquetltechhuica canin nemiyayah ito-
tatahhuan, itatahhuan huan iteixmatcahuan, pan ni canahya
tlen zanzampa techyolpactia huan techcuezoa, pan ni
macehualtlaltepactli tlen ya quichihchihua, quinextia, qui-
yoltia huan quichamanaltia ica itlahcuiloliz. Itlahtol
calaquiz huan mocauhtihcaz pan tonehnehuiliz huan
totlailnamiquiliz. Ica iamox, tocompah Crispín quitlapoa
iyollo quence tezcatl, huan yeca tlahuel tictlazcamatiliah.